

Papur y Plwyf

Papur lleol electronig plwyf

Llangynnwr – Llangynnwr's local
electronic paper

Rhif Un Chwefror 2011 February No. 1

Ar yr un diwrnod â lawnsiad papur electronig Rupert Murdoch, lawnsiwyd papur electronig i gystadlu ag ef yn Llangynnwr. Bydd Papur Y Plwyf yn son am ddigwyddiadau a phersonoliaethau yn ein cymuned. Os ydych am dderbyn copi, anfonwch eich cyfeiriad e-bost at papuryplwyf@hotmail.co.uk

Targed Cylchrediad

Mae Papur Y Plwyf yn anelu at gylchrediad o 250 erbyn mis Chwefror nesaf. Os yw'r papur o ddiddordeb i chi ac os hoffech i ffrind ei dderbyn, gallant gofrestru gyda'r e-bost uchod. Os oes newyddion a straeon gyda chi am yr ardal, anfonwch nhw at yr un cyfeiriad.

Albwm Pensarn ar E-Bay

Rhannwyd gwir drysor lleol â'r gymuned yn neuadd ysgol Llangynnwr dydd Sadwrn diwethaf. Mae hanesydd lleol o'r enw Paul Sambrook wedi bod yn gwneud gwaith ymchwil ar hanes y plwyf ar gyfer Prosiect Dim Carbon Cyngor Cymuned yr ardal a daeth o hyd i'r albwm ar E-bay. Achubwyd darn gwerthfawr o hanes lleol gan gynnig o bum punt. Tynnwyd y lluniau yn y 1920au a'r tridegau ac maent yn dangos adeiladu'r hufenfa, golygfeydd o Bensarn, y rheilffordd ac hen bont Caerfyrddin. Tynnwyd y lluniau gwreiddiol gan reolwr yr hufenfa, Percy Carter.

Roedd Mair Lloyd wrth ei bodd i weld llun un o'i chymdogion a dynnwyd bron wythdeg mlynedd yn ol. Bydd copi o'r lluniau yn cael ei anfon at yr ysgol a bydd yr albwm gwreiddiol yn mynd i amgueddfa Abergwili i ymuno â chasgliad o lythyron a dyddiaduron Percy Carter o'r blynyddoedd a dreuliodd yn adeiladu busnes llaethdy yng Ngorllewin Cymru.

Ail-lawnsio siop y pentref

Oherwydd salwch yn nheulu'r perchennog blaenorol caewyd y siop yn ddiweddar ond gall Papur Y Plwyf ddatgelu bod dau ddyn busnes lleol yn ail-agor y siop o dan enw cwmni Premier. Ar hyn o bryd, maent yn rhedeg yr orsaf betrol a siop yn Felinwen. Bydd siop Brynmeurig yn gwerthu papurau newydd, losin, nwyddau a dewis o gigoedd o gigydd Eddie Eynon o San Cler - un sydd wedi ennill gwobrau. Croesawodd Ann Lewis o Dir Ysgawen y newyddion gan ddweud pa mor gyfleus oedd cael siop yn Nhregynnwr.



Ymgyrch le ar waith yn Llangynnwr

Ar hyn o bryd, mae cefnogwyr le Dros Gymru'n dosbarthu copiau o bapur yr ymgyrch, **Post Cymru** i bob cartref yn y plwyf. Dywedodd ymgyrchydd lleol, Elwyn Williams, bod cefnogaeth gref iawn ymysg trigolion Llangynnwr. Soniodd hefyd am ddieter pobl leol ar ol clywed sylwadau llefarydd Gwir Gymru, Paul Matthews, "**nad yw'r Cymry y mwyaf arloesol na chreadigol ac y mae'r rhai sydd yn dangos hyn yn symud allan o Gymru**".

Bydd y bleidlais yn Yr Aelwyd ar Fawrth y 3ydd, 2011.

Cyngor Garddio

Ar ôl gweld y lili wen fach gyntaf yn ei blodau ar Nantycaws, rwy'n cofio ei bod hi'n amser meddwl am yr ardd. Fel arfer, rwy'n plannu garlleg ar y dydd byrraf ac yn ei fedi ar y dydd hiraf. Os anghofioch chi blannu garlleg, beth am drio math gwanwyn fel Cristro sydd â blas cryf ac sy'n storio'n dda? Bydd hau hadau tsili nawr mewn pot ar y sil ffenest yn gadael digon o amser iddynt aeddfedu a byddant yn blanhigion diddorol, lliwgar. Mae hefyd yn werth ystyried dechrau corbwmpen fel "Defender" o dan do. Peidiwch ag anghofio ei bod yn amser dechrau tatws newydd. Dechreuwch chwech wythnos cyn plannu.

**H.I. EVANS &
FEIBION**

LLaethdy Penymorfa

Llaeth Ffres Pasteuredig o'r
Fferm

Papur Newydd
Hufen ac wyau ffres
cludiant dyddiol

Ffon
(01267) 236972



MUDIAD YSGOLION MEITHRIN

**Cylch Meithrin
Llangynnwr**

Dydd Llun, Mawrth, Iau a
Dydd Gwener (Mon, Tues,
Thurs & Fri)

9.00 – 11.30

£2.50 sesiwn

Ysgol Llangynnwr

Dirgelwch y briciau coch

Efallai bod dirgelwch yr adeilad bychan o friciau coch yn y caeau uwchben Llygad Yr Haul wedi'i ddatrys, diolch i Glyn Howells o Dregynnwr. Mae Glyn yn meddwl mai hen stordy ffrwydron ydyw ar gyfer Tywi Works. Arferai tad Glyn gloddio ffnhonnau yn Llangynnwr ac fe ddefnyddiwyd ffrwydron i wanhau'r graig. Byddai mam Glyn yn casglu'r deinameit o Tywi Works a dal y bws o'r trydydd postyn lamp ar bont Caerfyrddin i fyny at Idole. Byddai'n cadw'r deinameit mewn basged siopa wiail wedi'i gorchuddio â lliain sychu llestri. Defnyddiwyd y deinameit hefyd ym mwyngloddiau plwm ar heol Capel Dewi. Os oes unrhyw syniadau eraill gyda chi, anfonwch nhw at Bapur Y Plwyf.

Geiriau hallt yng nghyfarfod y Cyngor Cymuned

Roedd lleisiau uchel i'w clywed cyn cyfarfod o Gyngor Cymuned Llangynnwr o ganlyniad i hen storïau nad yw'r Cyngorydd Elwyn Williams yn byw yn y plwyf. Y mae Elwyn, sy'n Gadeirydd y Pwyllgor Cyllid ac yn aelod o gorff llywodraethol Ysgol Llangynnwr wedi esbonio'n glir ei fod yn byw yng Nghystanog, sydd yn ran o blwyf Llangynnwr ac mae wedi hen flino ar y sylwadau cas ac anghywir am ble mae ei gartref. Bydd cyfeirio at ein ffrindiau ym myd y Gyfraith yn siwr o saethu'r cadno arbennig yma.

Newyddion Cyflym

Anodd ei ddilyn

Ar ol wyth mlynedd o wasanaeth i Gyngor y Gymuned, penderfynodd Wyn Davies, Clerc y Cyngor, roi'r gorau iddi. Bydd yn ymddeol ar ol etholiadau mis Mai.

System Un-ffordd Gwirfoddol

I leihau'r dagfa y tu allan i Ysgol Llangynnwr, bydd system un-ffordd gwirfoddol yn cael ei dreialu yn Lon Penymorfa cyn ac ar ôl amserau'r ysgol. Penderfynwyd gofyn i rieni ac aelodau'r gymuned fynd i'r ysgol o gyfeiriad y dwyrain (Plas Penymorfa) a gadael yr ysgol drwy fynd i'r gorllewin (Capel Babell) mewn ymgais i leihau tagfeydd oriau brig.

Arosfeydd Bws

Newydd

Bydd arosfeydd newydd yn ymddangos yn ystod yr wythnosau nesaf yn Nhir Ysgawen, Pensarn a Brynglas.

Cwynion ynglyn â graean

Cwynodd rhai o drigolion Awel Tywi am raeau yn y biniau halen. Roedd mor oer yn ddiweddar, rhewodd y graean yn solet ac nid oedd y trigolion yn gallu tynnu'r graean allan i'w daenu dros yr heol a oedd wedi rhewi.

Cyfyngiadau Cyflymdra o flaen yr ysgol

Cytunodd y Cyngor Sir i sefydlu cyfyngiad o 20 MYA ar ôl pwysau oddi wrth gynghorwyr cymuned a deiseb a arwyddwyd gan bron pob un o drigolion Lôn Penymorfa. Bydd y gwaith yn dechrau ym mis Mawrth. Croesawodd trefnydd y ddeiseb, y Cyngorydd Geraint Bevan, benderfyniad y cyngor.

Cynllun Plannu Coed yn y Gymuned ym Mharc Llangynnwr



Helpodd dros 20 o drigolion, o fabanod i bensiynwyr ar y dydd. Diolchodd Sara Howells, Cadeirydd y Cyngor Cymuned i bawb a ddaeth i helpu plannu 500 o goed fel rhan o gynllun Dim Carbon Llangynnwr.

Cynghorwyr Cymuned Newydd

Etholwyd dau gynghorydd cymuned newydd i Gyngor Llangynnwr. Daw Gwenda Lloyd yn lle'r arweinydd tenantiaid poblogaidd Doreen Valentine a ymddeolodd y llynedd ar ôl gwasanaeth hir. Gwenda yw cadeirydd llywodraethwyr Ysgol Llangynnwr a bu'n aelod gweithgar o'r gymuned ers blyneddau. Mewn etholiad di-gystadleuaeth, etholwyd David Watson yn aelod dros yr ardal ddwyreiniol. Yn wreiddiol o Lundain, mae'n gweithio i Gyngor Abertawe. Symudodd i Llangynnwr bum mlynedd yn ôl ac fe'i gyfetholwyd yn ddiweddar yn aelod o gorff llywodraethol Ysgol Llangynnwr.